



Tir Yimyim

www.tiryimim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimim@gmail.com

TAPAK 8

Yangia anidakangma :



Tir Yimyim



tiryimim@aolima



tir yimyim

TAPAK 7

Sumit Nagal Monte-Carlo Masters atema qualify süogo

Mexico-i Ecuador den diplomatic tesendaktep mauytsü telemtetba agi



VOL. XXI ISSUE NO. 175 (ADOK 175) DIMAPUR TENTONÜ (MONDAY) RONGCHII (APRIL) 08, 2024 ₹ 5.00

PM-JAY aser CMHIS Nagaland indang metetdaksür

Dimapur, April 7, 2024 (TYO): Nagaland nung April 1, 2024 nungi tenzüka Insurance Mode kübok Pradhan Mantri Jan Arogya Yojana (PM-JAY) & Chief Minister's Health Insurance Scheme (CMHIS) mapa inyaker saka CMHIS (EP) atema National Health Authority (NHA) IT Portal nung timtem kar ajurur.

Iba osang ya CEO, Nagaland Health Protection Society Thavaseelan K, IAS aser Jt. CEO, Nagaland Health Protection Society Dr. Kika Longkumer nati sangdong ka nung metetdaksü.

Tang ajurua aliba technical timtemtem angatettepsü mapa inyakdar anungji empanelled hospitals-i SHA aser Insurance Company Claim Processing team dangi offline registrations aser preauthorization requests email asütsü state sorkari

metetdaksüogo. Maneni, empanelled hospitals-i beneficiaries nem cashless services maneni agütsütsü state sorkarisa tetuyuba agütsüogo.

State sorkarisa empanelled hospitals kari cashless services magütsüra tsünglanglen agüja aliba ajanga osang sangoktsütsü shiogo. #Phone: 8880515011/ 8880515012 / 8880515013/ 8880515014.

E m a i l : nagaland.nhpm@gmail.com # Toll-Free Helpline Number: 14555 / 1800111565

Central Grievance Redressal and Management System: https://stggrams.pmjay.gov.in

Office Address: NHPS Office, 4th Floor, Drug Control Building, Directorate of Health and Family Welfare, Kohima Nagaland.

Assam Rifles-i NSCN züngsem 2 apu

Guwahati, April 7, 2024 (Agencies): Assam Rifles-i Northeast India nung telungpur maparen anema mapa inyakdang telungpur 2 puogo.

Osang tejangja kar nung ajemdaker Assam Rifles-i Nagaland aser Arunachal Pradesh nung mapa balala ana inyakdang National Socialist Council of Nagaland (NSCN) züngsem ana apu.

April 6, 2024 nü Assam Rifles units-i Project Colony, Zunheboto nung mita aodang NSCN (Niki Sumi) züngsem ka apu.

Iba tesem nung NSCN (Niki

Sumi) züngsem kati tashiyim agi sen sarua senzüba osang angashiba sülen mapang shitak nung mita aodang iba nisung apu. Pa ket nung country-made .32mm pistol ka ben alia apu.

NSCN telungpur aser pa ket nung apuba pistol ji Zunheboto police ket nung agütsüogo.

Ano, Changlang District kübok Kharsang tesem nung Assam Rifles units-i mita aodang NSCN (K-YA) züngsem ka apu.

AR-i mapang shitak nung osang angashir inyakdang telungpur den pa ket nung .32 pistol ka apu.

Takok angutsü mera ka dang lir: PM Netanyahu

New Delhi, April 7, 2024 (Agencies): Gaza rara nung Israel-i takok angutsü mera ka dang anünga lir aser Hamas-i pua alir ajak mechiok tashi yimjung malitsü ta Israel Prime Minister Benjamin Netanyahu-i Deobarnü metetdaksüogo.

October 7, 2023 nü Hamas telungpurteri Israel amakba sülen rara adoker ita trok ajungba tenüng nung cabinet senden ka amendang Netanyahu-i iba olen jembi.

"Asenok takok angutsü mera ka dang anünga lir, saka asenok jashitsüsa aser temulung raksatsüsa tenlaogo" ta pai ashi.

Cairo nung international

mediators den yimjung maparen tenzüksü imlaba mapang ka nung "Pua alirtem mechiok tashi ceasefire malitsü. Ibaji mataloktsü. Israel-i tenangzüktep agütsü remema lir, Israel-i surrender asütsü renema mali" ta PM Netanyahu-i ashi.

"Alimai Israel rongshiba agi Hamas temulung uslushidaksür. Anungji alimai Hamas rongshitsüla. Iba ajanga pua alirtem chioktsü" ta paisa ashi.

April 1 nü Israel-i Gaza nung tayimtsü amshia amakdang World Central Kitchen nung aid workers 7 tepsetba atema linük aikati aitsür.

Delhi Ao Kaketchir Telongjem-i metetdaksür

Dimapur, April 7, 2024 (TYO): Delhi Ao Kaketchir Telongjem (DAKT)-i April 8, 2024 nungi registrations maparen tenzüksü osang metetdaksüogo.

Iba ya 2024-25 kümsük atema alitsü aser Delhi nung class 7 nungi shir kaketchir ajak aser kibong mekümi alir tashi DAKT kübok tenüng zülüoktsü

metetdaksüogo.

Iba dak sendakba nung DAKT President Yimjungjungshi Sanglir (8731050645, Statistics Secretary Imcharenba Atsongchanger (9863080191) aser Information & Publicity Secretary Kilemjungla Lemtur (8259-070504) nunger den tongtepsü metetdaksüogo.

Konyak civil society teloktemi PDA chairman & NDPP chairman jaoker

Dimapur, April 7, 2024 (TYO): Konyak Civil Society Organizations (CSOs) tenüng nung Konyak Union (KU)-i PDA chairman aser NDPP president Chingwang Konyak dang asüngdangya asütsü atema jaokba shidi ka social media nung prokshir.

March 30, 2024 nü Konyak Union (KU)-i tetuyuba kar agütsüba anema Chingwang Konyak-i inyakogo ta KU president Tingthok Konyak, Konyak Nyupuh Sheko Khong (KNSK) president Ponglem Konka aser Konyak Students' Union president T Noklem Konyak nungeri sign asüba shidi

ka belenshiogo. April 5 nü Wokha nung election rally ka nung Chingwang-i mejembitsü olen kar jembi.

People's Democratic Alliance indang consensus candidate atema nüboyimba sentong ka nung Chingwang Konyak-i "ENPO-i election nung shilem magibaji parnok takoksa dang asütsü" ta shia liasü.

Chingwang-i aiben Frontier Nagaland Territory (FNT) onük dak sendakba nung tim masüba onüktem jembiogo ta Konyak Civil Society Organizations (CSOs)-i metetdaksü.

Chingwang-i Eastern

Nagaland nunger aser talisa Konyak nunger mezüngmeshiba ya magizüker, ta parnoki ashi.

"Nai Konyak CSO bangdakpur anema inyakba dang masü saka Eastern Nagaland nunger ajak maaksüdaksüogo aser tenüng menüksüogo. Nai tebilemetsü abenba senso aser lennir ka ama memesük inyakogo" ta SCOs-isa ashi.

Parnoki Chingwang Konyak dang iba sangdong agütsüba sülen ghonda 48 tsüngda Konyak Union office, Mon Headquarters-i arutsü mapang atakzüktsüogo aser tashi mangara tapet temerenshitsu agütsütsü metetdaksüogo.

7th Pay Commission-i Allowance aika repringshimogo

New Delhi, April 7, 2024 (Agencies): Centre sorkar mapa inyaktertem aser pensioner tem asoshi osang ka tajung lir aser ibaji 7th Pay Commission kübok allowance 6 repringshiba lir.

Department of Personnel and Training (DoPT)-i April 2, 2024 nü Office Memorandum (OM) on April 2, 2024 nü Office Memorandum (OM) ka agütsüba nung iba ya shia lir.

Child Education Allowance: Child Education Allowance meyipa repringshimogo aser mapa inyaker indang DA 50% akümdang allowance 25% agütsütsü. Child Education/ Hostel Subsidy ya tanur ana nem agütsütsü aser hostel subsidy dena ita nung Rs 6,750 agütsütsü. Matamabensaba tanur lira

allowance anasü agi teimba agütsütsü. **Risk Allowance:** Lendong ajurutsü ana nung aliba mapa balala nung inyaker nem Risk Allowance teimba agütsütsü. Iba allowance ya mapa inyaker ka temang nung timtem ajurudang agütsütsü aser regular pay nung madentsü. **Night Duty Allowance:** 7th Pay Commission recommendations ajanga Night Duty Allowance (NDA) repringshimogo. NDA kübok adenba mapa inyaktertem ita shia basic salary Rs 43,600 asütsüla.

NDA ji 7th Pay Commission-i latetba basic pay aser dearness allowance rates nung ajemdaker asadangtsü. **Special Allowance:** Parliament

Assistants atema Special Allowance 50% ajungkettsüogo.

Iba ya Parliament session alidang mapa inyaktertem atema lir.

Over Time Allowance: Ministries/Departments dang Overtime Allowance agütsütsü asoshi 'Operational Staff' rosters meshiogo. Overtime mapa inyakba repringtsü atema Biometric attendance amshitsü akok.

Special Allowance For Women With Disabilities: Matamabensaba tetsürtem asoshi aser talisa tanur alirtem mesüra matamabensa tanur aliba tetsü nem ita shia Rs 3,000 special allowance agütsütsü. Iba allowance ya tanur asoba anogo nungi tenzüker arishi küm 2 matong tashi agütsütsü.

Special Allowance: Parliament

Nagaland Deputy CM-i asayamenüba atema tatok meshir

Dimapur, April 7, 2024 (TYO): Nagaland Deputy Chief Minister Y Patton-i tawa olen ka jembiba atema ashishitep ken o ka adokogo saka Deobarnü pai sangdong ka ajanga iba osang jangjashitsüogo.

"Lok Sabha election atema nüboyimba sentong ka nung pai asayamenü olen ka jembiogo. Iba ya inyaktsüba masü saka elections mapang yimdaklirtemi tayongzükba aika ajuruba atema asayamenüa jembiba dang lir" ta Y Patton-i sangdong nung shia lir.

Election mapang nung o mebilemdangi jembiogo saka ni democratic maparen aser senso shia dak vote enoktsütsü temeten akhümtsübuttsür ta paisa ashi.

Pai jembiba olen ya democracy alema inyaktsüba mesüra ajembanga ayutsüba atema masü saka asayamenüa jembiba dang aser iba ajanga mangatettep adokba atema sasa bilemer ta Patton-isa metetdaksüogo.

Paisa taruba Lok Sabha elections nung senso ajaki shilem



April 5, 2024 nü Wokha nung Lok Sabha atema PDA consensus candidate Dr. Chumben Murry atema nüboyimba sentong ka nung Nagaland Dy. CM. Y Patton-o o jembiba angur.

agütsü ayongzükogo.

NPCC-i Y Patton anema ken o benoktsü

Nagaland Deputy Chief Minister Yanthungo Patton-i jembiba video ka prokshiba sülen Nagaland Pradesh Congress Committee (NPCC)-i Election Commission of India (ECI) tsüngdang Model Code of Conduct (MCC) anema ken o ka benoktsü metetdaksüogo.

Nagaland Deputy Chief Minister aser BJP lennir Y Patton-

i "village council chairman, gaon burah aser voting agents nem dang vote enokdakjang. Yimdaklirtem nem timtem tügütsü, parnok alui yokang. Yimtsüng lennirtemi votes ajak enokjang" ta Nagamese oshi agi jembiba video tatsüka ka kanga prokshir.

Iba ya MCC anema lir aser election nung tim masü inyaktsü ajungmesoba lir anungji onoki ECI tsüngdang ken o ka benoktsü ta NPCC-i metetdaksüogo.

Patkai Christian College indang Literary & Cultural Fest temogo



Dimapur, Rongchii/April 07 (TYO): Patkai Christian College (Autonomous) ajanga April 5 & 6, 2024 anogotem "Identity and Diversity" omen nung ajemdaker 'Literary & Cultural Fest 2024 Golden Jubilee Edition' sentong ayongzüka liasü.

Kaketshirtem academic bushiba den külemi sobaliba tera den sendaktepsü nükjidong nung ananü sentong nungya kenshi oshi aser sobaliba yimya balala nung toktepa liasü.

Mezüng anogo o jembir Principal, Godwin Higher Secondary aser PCC indang alumni, Mhasino Metha-i kenshi oshi nung shilem agitsü

nüngdakba indang ashi aser ibaji ajanga classroom jara pezü alema oa skills tem sayutsü, ta ashi.

"Iba yagi na tarutsü asoshi melenshitsütsü," ta lai ashi.

Kenshi oshi tetoktepba nung jepdak jembi, tar nunger otsü ashiba, drawing/painting, essay züluba aser o intepba nungertem liasü.

Tanünü Cultural Fest nung tetushi tesemdanger philanthropist aser politician, Dr. Roland Lotha liasü aser pai kaketshirtem dang pei sobaliba ayak mesamadaktsütsü ashi.

"Sobaliba ya tenük agi manguba lisü ka lir aser iba yagi

asenok sendaktepsür. Asen ayak samara, asen asoshi tejashitiba mapangji asütsü," ta pai ashi.

Iba anogo folk drama, folk dance, folk songs aser indigenous games nung tetoktepba liasü.

Kenshi oshi tetoktepba nung Extempore Speech nung Limayala Aier-i mesüng aser Mezhusieno Peseyie-i tanabuba jenjang ngua liasü.

Essay Writing nung Vemüzilu Chuzo aser Khriese Sophie nati mezüngbuba aser tanabuba jenjang angu.

Debate nung Neihu Thulhu-o aser Kehinye Seb nati mezüng aser tanabuba jenjang angu, Art/Painting nung Tsepe Mekhru-i mezüngbuba aser Kokoni Sani Basena-i tanabuba jenjang angu aser Folk tale nung Nannila Zimik-i mezüngbuba aser Phangrei Rungsung-i tanabuba jenjang angu.

Cultural & Indigenous games tetoktepba nung Folk drama Ao kin, Folk dance nung Tangkhul kin aser Folk song nung ENSU ajanga takok angu.

Cooking nung Khochopeni Kikon & Apilo Ngullie (Lotha), Cock fight nung Intilemba & Phangrei, Five stones nung Azakali Yeptho aser Inchale, Tug of war (tetsür) nung Zeliang kin aser Tug of war (tebur) nung Angami kin ajanga takok ngua liasü.

Northeast Theatre Festival nung "The case of Longti Village" jilushi ai



Northeast Theatre Festival nung "The case of Longti Village" jilushi aiba mapang tangokba noksa angur.

Dimapur, Rongchii/April 07 (TYO): National School of Drama, New Delhi ajanga ayongzüka Northeast Theatre festival, Poorvottar Rashtriya Natya Samaroh 2024 sentong New Delhi nung March 27-30, 2024 anogotem agia liasü.

Iba benjongmung nung Assam nungi production ana, Manipur, Tripura aser Nagaland nungi production ka-kai tesem asem (National School of Drama, Bharatmuni Natyagrih CCRT Dwarka & Bharati College University of Delhi) nung shilem agia liasü.

Nagaland production team

ya Hill Theatre tenzüksang Bendang Walling lenisüba kübok Sentilong Ozukum-i züluba "The Case of Longti Village" otsü jilushi yia liasü. Iba jilushi ya March 29 nü National School of Drama aser March 30 nü Bharatmuni Natyagrih, Centre for Cultural Resources and Training, Dwarka nung ai.

'The Case of Longti Village' ya yimtsüng ka nung mijang atoba aser meimchiri rongsen benboba ajanga loktiliba, yimtenren, sobaliba, tamangba aser lipajen nung timtem ajuruba otsü ka lir.

Iba jilushi ya Nagamese

oshi nung minute 70 agia Hill Theatre nungi theatrical artist nisung 15-i ai.

Iba jilushi nung Production Designer ya Limanungdang Longchar liasü aser Assam nungi Bikash ajanga lighting kettangüsü liasü.

Iba benjongmung ya tongti tesemdanger Dr. Sachidanand Joshi, Member Secretary, IGNCA ajanga tenzüksü aser tetushi tesemdanger Robin Hibu, IPS ADG of Police, New Delhi liasü, kong Chittaranjan Tripathy, Director, National School of Drama ajanga tarur pela agizükba o jembia liasü.

Assam Rifles temi NSCN (Niki Sumi) züngsem ka apu



Dimapur, Rongchii/April 07 (TYO): Zunheboto kübok general area Project Colony nung NSCN (Niki Sumi) züngsem ka aliba osang tejangja angazükba nung ajemdaker Assam Rifles temi April 6, 2024 nung joint operation ka agia liasü.

Iba mapang NSCN (Niki

Sumi) züngsem ka apu, shiba general area Project Colony, Zunheboto nung tashiyim amshia senotsü meshia jajar ka liasü.

Iba nisungba ket nung contry made .32 pistol ka liasü aser pa den pa ken nungi ngutetba hadir ya Zunheboto Police Station nem agütsüogo, ta sangdong ka ajanga ashi.

Meghalaya: Arunachal nung sen 1 crore apuba Congress-i NPP dak tongloktsü

Shillong, Rongchii/April 07 (Agencies): Meghalaya Chief Minister Conrad K. Sangma-i aniba National People's Party (NPP) den tesendaktep tajung aliba contractor ka indang gari nungi sen 1 crore ngutetba sülen Congress party-i NPP anema jembia aitsü.

Iba gari ya Arunachal Pradesh nung NPP atema nübu yima jajaba mapang Meghalaya Chief Minister Sangma sülen anidakba gari tem rongnung dena liasü.

Meghalaya Pradesh Congress Committee indang working president Deborah Marak-i iba contractor ya party den tesendaktep tajung lir aser odangbo metoktsütsü ta ashi.

"Meghalaya nung nüburtemi asentzü sena aayangba sen paia ya kodaser Arunachal Pradesh leni bener aor?" ta Marak-i asüngdang.

Digital ajanga senotsü tsütatepba putu ka nung sen

cash nung yamai bena aliba yagi election dak sendakba nung amshitsü tebilemba aliba sayur, ta Marak-i ashi.

Ajisüaka iba mangatettep nungi NPP pila alitsü meranger. Sangma ya social media nung kanga teyakyak lir, saka pai iba tatalokba indang mejembir.

April 4 nü Arunachal Pradesh nung Longding district kübok Kanubari check post nung Sangma indang convoy sülen anidakba SUV gari ka nungi sen crore ka apu.

Sen ya Badri Rai & Construction Ltd nung executive director Harshvardhan Singh meyong Fortuner gari ka (AS01 ET 5252) nungi ngutet.

Flying squad aser static surveillance team temi meita aoba mapang sen ya apu aser ken o metembang tashi yua alitsü atema State Bank of India nem agütsü ta kettangtsürtemi ashir.

Asenoki otsü ashitsüla: Dr. Akum Longchari

Dimapur, Rongchii/April 07 (TYO): The Morung Express osangkaket yimo zülur Dr. Akum Longchari-i kaketshirtem dang otsü tasen yanglua ashitsü ayongzüik. Pai iba o ya Honibarnü Patkai Christian College indang Literary and Cultural Fest 2024 sentong nung ashi.

Naga nunger ayak tashi mait kumogo aser tejakleni moi tsükdaka lir aser tasen kecha madokteter, ta pai ashi.

"Asenoki alu ayimba anenogo, asenoki tesendaktep lu ayimba anenogo, asenoki shisatsü tasen, maongka tashi lu ayimba anenogo," ta ashi.

Anungji lanurtemi 21st century Naga nunger sobalibaji koma alitsüla ta shisadanga tarutsü asoshi tebilemba tasen aser shisatsü tasen adokdaksütsüla. "Kaketshirtem nungi otsü tasen adoktsüla aser ibaji ajanga dang asenoki cycle

maneni lidaktsütsü, mangdang tasen adoktsü ajungmesotsüla," ta Dr. Longchari-i ashi.

Ibaji adokdaksütsü asoshi lanurtemi mera tali agi tenzüksüla. "Asen spiritual boundaries, intellectual boundaries, shisatsü, asenoki alima angatetba yimyattem. Oshi tasen adokdaksütsü asoshi asenoki tasü ita mera agitsüla," ta pai ashi.

Iba oshi tasenba ya asen ayak bener jajaba ka asütsüla aser ibaji ajanga tang aser tarutsü sendaktepsüla. Tarutsü aser tesüiba ajurutepba ajanga tang na aser ni kechi inyaktsü aji metetdaksür," ta ashi.

"Identity and Diversity" omen nung kongshia jembidang, nisung shia yimya aser sempet balala lir aser pei müketa aliba angatetba aser shisadanga nisung shia balala lir, ta Dr. Longchari-i ashi.

BJP-i Delhi CM anenjang ta akhang aser AAP-i lumia longkak ait



New Delhi, April 07, 2024: Aam Aadmi Party (AAP) tongti lenir aser Delhi Chief Minister, Arvind Kejriwal apuba anema AAP lenirtemi mener lumia longkak aitdang tangokba noksa nung angur.

New Delhi, April 07 (Agencies): Amongnü New Delhi nung BJP-i Delhi Chief Minister, Arvind Kejriwal CM menden nungi anenjang ta maneni takhangba agüja longkak aitdang metre 600 shi dang pilar AAP-ia par lenir Kejriwal apuba anema longkak aitogo.

Delhi excise policy ken o dak sendakba nung Mach 21 nü Enforcement Directorate-i Kejriwal apu, aser tang pa Tihar jail nung puoka lir.

Delhi nung BJP-i Kejriwal CM menden nungi

anentsütsüla, ta takhangba agüja arudar. Ano külen AAP lenirtemi court dang Jail nung Delhi Chief Minister Office amenoktsü akhang.

BJP-i ayongzüka longkak aitba sentong nungji state BJP Tir Virendra Sachdeva den Lok Sabha election candidate tem, party MLA tem aser council züngsemtem denema liasü.

BJP longkak aitba tesem nungjagi metre 600 shi dang pilar Jantar Mantar nung AAP lenirtemia lumia longkak aitogo.

Longkak aitba tesem nung osangbenertem den jembidang

Delhi Minister Atishi-i, "ED aser CBI-i BJP indang yimtenren hadirtem ama inyaker," ta aitsü.

Atishi-isa, Delhi nung sensotemi Arvind Kejriwal kanga meimer aser paji Chief Minister ka ama dang masü saka tebu ka, jabaso ka mesüra adianu ka ama züngshir, ta ashi.

Laisa, BJP indang Enforcement Directorate (ED) aser Central Bureau of Investigation (CBI)-i kanga merangyonga parnoki AAP lenirtemi ochimashi inyaka lir ta kuli magütsüteter, ta ashi.

PM-i ochimashi samatsüner saka INDIA-i ochimashir kümzükner: JP Nadda

New Delhi, Rongjuui/April 07 (Agencies): Amongnü BJP national Tir, J P Nadda-i, bail nung chioka alirtem mesüra jail nung tang puoka alir INDIA teloktep nungi lenirtemi ochimashirtem kümzüktsü meranger, ajisüaka Ato kilonser Narendra Modi-ibo linük nung ochimashi samatsütsü atema kanga meranga inyaker, ta ashi.

Tang Delhi Chief Minister Arvind Kejriwal jail nung lir aser Sonia Gandhi o lar jabaso Rahul Gandhi na densema Congress lenirtem bail nung chioka lir, ta Nadda-i ashi.

Chennai nung Lok Sabha election atema nüboyim sentong ka nung jembidang Nadda-i, "Ato kilonser Narendra Modi-i, 'ni ochimashi samatsütsü' ta ashir, ajisüaka INDIA teloktep lenirtemi, ochimashirtem kümzükang, ta ashir. Ibaji parnok inyakyim. Parnok ajaki parnok kibongtem aser parnoki ochimashiba nungi parnok sasa kümzüktsü meranger," ta ashi.

Linük tesem ajaklen opposition lenirtemji parnok kibong züngsemtemi akümba party tem dang lir aser parnoki parnok kibong party tem kümzüktsü meranger, ta pai ashi.

"Ibayongji ochimashi DMK sorkar yimsüsüba kübok Tamil Nadu nung terenlok mali, anungji ochimashi maliba linük ka akümtsü atema nüburtemi DMK aser parnok den teloktep party tem sendoktsüla," ta BJP Tirisa metetdaksü.

Nadda-isa, "DMK aser Congress-i Tamil nung sobaliba aser inyaksangshitem anema inyaker; Tamil nung sobaliba asüngsashitsü atema onoki parnok anema rarar, ajisüaka parnoki Tamil nung sobaliba samatsütsü meranger. Nenoki iba ya angatetsüla," ta ashi.

Paisa, Ato kilonser Modi lenisüba kübok linük nung terenlok mapa aika inyakogo, ta ashi.

"2019 küm alima nung rongsenkettzüng tashi tsütsü India jenjang 11buba nung liasü saka Modi lenisüba kübok tangbo jenjang 5buba kümogo. Pa tasembenbuba Ato kilonser kodang kümdir idangjibo alima nung rongsenkettzüng tulutiba linüktem rongnung India jenjang 3buba akümtsü," ta paisa metetdaksü.

Paisa Centre nung BJP-i aniba sorkar kübok sector balala nung terenlok aliba metetdaksü.

Congressmanifesto mapa kuma inyaksüji tamakoktsü: Nirmala Sitharaman

Bengaluru, April 07 (Agencies): Union Finance Minister, Nirmala Sitharaman-i, Karnataka nung Congress tenangzükbatem ajanga terenlok mapatem nung khuret agütsür aser state budget-a yirutsür, ta metetdaksü.

Laisa, Lok Sabha election atema Congress party manifesto mapa kuma inyaksüji tamakoktsü, ta metetdaksü.

Bengaluru nung osangbenertem den jembidang lai, "Congress-i parnok indang manifesto nung tenangzükbatemji mapa kuma inyaksü tamakoktsü aser budget deficit asütsü. Itemji mapa kuma inyaksü atema senotsü agi meperitsü," ta ashi.

Laisa, "Iba linük atema nenok mangdang ka lir asü?"

Technology aser shisaliok ajanga koma asen lanurtem yaritsüar nenok dak teimla lir asü?" ta asüngdang.

Hokolbarnü Congress-i Lok Sabha election atema party manifesto sayaogo.

Congress party manifesto ji aija Sitharaman-i, Congress tenangzükbatemji odang nangzükba lir, ibaji mapa kuma meinyaktetsü, ta ashi.

Karnataka nung Congress sorkar aija lai, "Mezüngbuba nung ni parnok (Karnataka sorkar) dang ya asüngdangner-kechiba May 2023 nung sen crore 20,000 indang project pezü anenadok? Kechiba kibong shia nem tzü agütsüba 'Jal Jeevan Mission' mapa kuma meinyaker? Parnoki yamaji meinyakner (Central scheme

ajanga tajangzük magütsüner) aser ibaji ajanga tangbo Deputy Chief Minister DK Shivakumar-i joko pai gari lenmangtem yangluba dang nungibo irrigation projects nung ang taliba rangloktsü ta jembio," ta ashi.

Lok Sabha election atema Congress-i manifesto ajanga aluyimertem atema MSP legal guarantee agütsütsü, MGNREGA kübok anogo ka aayangba sen 700 kümtsütsü aser sensaker kibongtem shia nem küm shia sen lakh 1 shi jenjang teyari agütsütsü densema tenangzükba aika metetdakja lir.

Yaküm Karnataka assembly election nung Congress-i BJP madak takok ngua BJP sorkar atsüngdoka liasü.



April 07, 2024 nü Bikaner nung Lok Sabha election atema nüboyim sentong ka nung Defence Minister, Rajnath Singh-i jembidang tangokba noksa nung angur.

Anantnag nung Mehbooba Mufti-i Ghulam Nabi Azad den tokteptsü

New Delhi, April 07 (Agencies): Taruba Lok Sabha election nung taoba mapang Jammu & Kashmir nung chief minister inyakra aser Peoples Democratic Party (PDP) tongti lenir, Mehbooba Mufti-i Anantnag constituency nungi tokteptsü, ta sangdongogo.

Amongnü PDP-i, Mehbooba Mufti-i Democratic Progressive Azad Party nungi lenir Ghulam Nabi Azad den tokteptsü, ta metetdaksü.

PDP Parliamentary board tongti, Sartaj Madni-i, PDP youth wing president Waheed Parra-i Srinagar menden nungi aser taoba mapang Rajya Sabha züngsem, Mir Fayaz-i Baramulla menden nungi tokteptsü, ta metetdaksü.


PDP-isa, Jammu Region kübok Udhampur aser Jammu

Lok Sabha menden na nung parnoki Congress party candidate tem pusemstü, ta metetdaksü.

Mehbooba Mufti-i, opposition INDIA teloktep nung densema aliba National Conference (NC)-i longjemer tokteptsü memelungi state nung menden asemprong atema candidates sangdongba ajanga PDP-ia menden asemprong nungjagi tokteptsüsa akümer, ta metetdaksü.

Opposition INDIA teloktep kübok National Conference party-i Jammu nung Congress nem Lok Sabha menden ana lemsüktsüogogo.

Tang tashi nung Bhartiya Janata Party-ibo Jammu nung Lok Sabha menden asem atemaji candidate tem tenüng mesangdong.



April 07, 2024 nü Nawada nung Lok Sabha election atema nüboyimba sentong ka nung Ato kilonser Narendra Modi aser Bihar Chief Minister, Nitish Kumar na tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, APRIL (RONGCHII) 08, 2024

Tera Agi

Tera ta kodang südir, ibai ishika mesüra tilaka dang ajar. Ya kanga mechimenu, mezüngshiba, mesüra züngoktsüsa jenjang maket, chikhumajung. Iba yabo oda mangu ama toktsütet. Tera ta asüba nung yabo tebilemtsü mesüra khuret mali. Kechiaser tera, ishika, tilaka yabo oda ajaki agütsütetba aser ngutetba ka lir. Kodang tera ta jembidir, ibaibo mapang timbaka nung angati asür. Asenoki kiyonger kidang metsü, mersü, süngojobok, amala tera meshitsü akok. Tera dang asünungji ajaki menungnangi odang angati agütsür. Teraka agütsütsüba nungji khuret mali. Ano senpu-tsüsuba mapang nunga, kodang nisung kati sen tera apudi mesüra apujang ta südir yangjibo khuret mali. Kechiaser teraka atemajibo tebilemtsü kecha mali. Anungji meyipa anguyonga manguyonga kecha masü ta sür nongnanga melii asenoki odang aputsür. Asenok anogo shia taküm liyonga aodang tera ta asüba o nung ya tebilemtsü aser khuret kecha mali. Chiyungtsü süshia, senotsü süshia terakajibo ajaki züba-zübaa bener arutetter. Teraka bener arutsübaji tasak masü. Aji oda süaka, ano tera ta asüba yagi asenok taküm nung tasü o taküm na bendangtsü akok. Nisung ka ticket ajak renema yur Delhi mesüra Mumbai aotsü apuso, saka airport tera menur atong, idangji tayimtsü oadoker liasü. Nisung ka Chennai alutsü atema ita ka jelia ticket renema ayu, saka Dimapur railway station tera menur atong. Idangjibo train oadoker liasü. Tera menuba ajanga aienlen jagi mouteti sentong ajak amajok aküm. Class ter result nung mark tera agi matongba ajanga top 1 jenjang mengutet. Mark tera agi matongba agi top 20, first division mesüra second division jenjangi mai. Mark tera agi matongba agi fail asü. UPSC aser NPSC tatitang kanga junga agütsü, saka mark tera agi matongba ajanga fail asü. Mark tera agi mabensaba ajanga taküm piyong mapa mengui timtema alitsüsa aküm. Ano rasadi süra tera indangji yamala mesükba aika dang lir. Gari tera mekümdangi ani, accident tulu ajurua tsükset. Gari tera yimbazüa anidang memeteti accident ajurua taküm piyong lemtar alitsüsa tetsüng-teben kosük, koda tesusatsü. Mozü tera tali ajem; timtem tulu ajuru. Mozü tera tai agi; ajungbena süadok! Tola temesüng ka nung memeteti rong temerem tera teplok, joko ibaji menendoktsüba dang, mesüra mapa inyakdang asemtsüba dang. Tejak kanga junga meyr powder tobur junga menok, saka ponak tera atsük, iba jagi tangari menütsür, mesüra pa mesüra la tobur ajungba ajakto tazüngla kümdaktsür. Taküm nung tera yagi timtem, teraksa, tamakok aluba aser ajuruba aika angutsü. Tanü asüng asenok Khristantem taküm ya reprangdangra 'Tera' ta asüba nungji na alanga melikama? Temenen tulukabo masü, saka kanga tila - Sübokrem tera agi, tiyazü tera jembi, tangar tera ashioktsü, tera külakzük, nüngsen tera jembi, jembishinü tera mazüok, tekalen tera meshitak, achi-ajem tera mazüok, nüktapangta yimya tera aket, ano yamala aika. Itemji tera mesüra tilaka dang asünung temenen tulubo masü, tebilemtsü kangabo mali amai. Saka meimchir tenük nung anak tera ai nung tenük mesakteti kecha mangu akümba medem, temenen tera mesüra tila ka jagi molumi tiai anitsü aser tera agi kotaki moutettsü. Temenen teraka metoktsütetba ajangaji tera nung, tila ka agi kotaki mouteti molumi tiaji ajangzükra ayatai! ibaji koda tesusatsü tulu asütsü. Anungji tang temenen tera nungji asenok mepitaka alanger lia tasübai menepadokra jepaka nüktzü maluba tiaji ajurutsü. Ya oda lepshia ashir, 'Tera' ya tuluka, aika mesüra tesashibo masü asünungji yangji khuret aser tebilemtsü kecha mali. Ibai mangu ama odang toktsütetba ka, saka tera jagi asenok indangindanga molumilen jagi anir asünungji, aser tera ya meindoktetba aser mazüoktetba ajanga tesamar rongnung densemtsü asünungji, tera nungjagi talangka pilaa alitsüla. Tera nungji alepdaker alangtsü aser taküm samatsü masü na?

OLEMSABANG

PRESCHOOL YA KOMA INYAKER: (How to run a preschool)

~ Apokla Ben

Preschool education ya Asian aser Indian bo küm 2 – 6, American aser Westernerbo küm 2 – 8.

- * **0 – 3, Toddler or Crèche or Nursery** ta ajar. Iba mapang ya "Ni dang", ya kü asoshi dang", "kü meyong" ta asüba mapang (this is the stage of - I, me, myself). Tetsütem, ne tebang azüokang kümdangang, kümdangang, kümdangang, tanur jagi angadar. Parnok kü meyong, kü nem, ni dang ta asüba mapang. Pei janaba ji ang süng kü meyong ta asüba mapang. Parnok dang ya "the difficult two" ta ajar, kechiaser parnok amshitsü kanga tasak. Parnokji peii dang ajak seneba mapang, domineering, independent, selfish etc. Parnok iba mapang ya assertive, curious, explorative. Parnok peisasa dang oadoker, saka ano nai ajidar ta amanger aser sottsü aser kümzüksü yimlar. Pai tetsü, tebu, tedi, teyi ajak meteta lir. Pai pei asayatsü kanga junga line kümteta ayutsü tenzüker, asayatsü oset tem koba tem koba telok asütsü meteta rizünger (grouping the family). Iba mapang nungi pa asayatsü oset tem kong nungi bener aru aser agizük yangji shidak bener oa rizünga ayutsü sayuang.
- * Ibai beginner aser primary stages (4 – 6) Preschool nung iba ya class **Kinder garten** ta ajatsü. Parnok ya sensory and motor periods lir.
 - Kechi nungsa develop asür süra : (3 areas of developmental stages)
- * Psycho-motor development, big muscle – limbs, small muscle – fingers, etc.

Muscular co-ordination and movements:

Parnoki tenük agi angur, tenarong agi angashir saka ibaji tekolok aser temulungjang dangi bener senshitsüba meilongi. Kechiaser muscle ji ano jungjunga develop masü. Arakzüksü meilongi.

- * Cognitive – mental, intellectual, perception, information, knowledge, item ajak meilongi dang mapa inyaker.
- * Affective – emotions (personal, social). Tanela –jakla taküm, (Moral – spiritual, aesthetic with attitudes). Anungji parnok dang exercise agüjang tetsüng teka tali arakzüdakjang. Pa meketa alibattem indang rasaa shiang.

Küm 0-6 ji, Preparatory (pre-nursery) mezüng küm- 2 & 3 years, Nursery- 3&4 years, Kinder I ji 4 years, aser Kinder II 5 years tem, ta lemsar sayutsüla.

Tanur ji kodang küm 7 jungdir Class I nung mendaktsütsü. State government policy nunga aji melar. Anungji class 1- i aodangbo itemi sayutsüla:

- * Traffic Rules, kodang lemanng ajangtsü, kong nungi ajangtsü, shiba dang tashiba angatsü.
- * Tanur dang sayuba kentemji - Animal songs, Songs of numbers, color songs, parts of the body, Christmas songs, Rhymes. Aser item ajak tetsung – teka arakzua pongtena tsungsanga sayutsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kelingmen Baptist Arogo nung First Aid angazükba sentong ka agi



Mokokchung, Rongjui/ April 07 (TYO): Palliative Care dak sendakba nung First Aid angazükba sentong ka Kelingmen Baptist Arogoi Kelingmen nung tetsürtem asoshi ayonga April 6, 2024 anogo nung kanga takok ngua agiogo, ta Kelingmen Baptist Arogo nung pastor, Junghshimanen-i sangdong ka ajanga metetdaksü.


Christian Hospital (ICH) nungi Mrs. Imtinaro, Principal, ANM School of Nursing, ICH, Mrs. Narola Walling, Chaplain, ICH aser Ms. Atila Tutor arua kanga temoatsü ngua agi.

First Aid angazükba Seminar dak alaka Mrs. Narola Walling ajanga tetsürtem dang, Tsüngremi nisung shia nem sempet kakabosa agüja lir, anungji nai mapa tulu meinyakaka

ochishia dang nü sempetji amshira tilaka nung dang süaka aika asoshi tesangwa lenmangji aji asütsü, ta tajungshi tulu agüja temoatsü tulu ngua liasü.

Iba training nung ajak agi tetsür 54 aden. Tsüngremi Kelingmen nung aliba tetsürtem maneni aika asoshi teyarir tajung südakjangma ta sarasademer, ta kasa sangdong ajanga lemsatsep.

Iraq nung Chaldean Arogo Tenla ki ka tanaben yanglua semzük



April 5, 2024 nü Iraq kübok Mosul yimti nung tawa renemba Chaldean Catholic Arogo Tenla ki ka semzükba sülen tekülem sentong agidang tangokba noksa nung angur.

Mosul, April 07 (Agencies): April 5, 2024 nü Iraq kübok Mosul yimti nung tawa renemba Chaldean Catholic Arogo Tenla ki ka semzükba tekülem sentong agiogo.

Küm aika tejaklen IS kiralongrartemi iba Tenla kiji religious police office ama amshia liasü, ajisüaka iba Tenla ki tanaben yanglushiba sülen Khristantemi Tenla kiji semzükba tekülem sentong agi tenzükogo.

April 5, 2024 nü mezüing tekülem sentong nungji Khristan 300 shi aden.

Arrshi küm 74 aser taoba mapang school director, Ilham Abdullah-i, "Iba anogo atema ni mapang talangka nungi kanga yongyaa liasü," ta metetdaksü.

Paisa, "Khristan kibongtem tanaben Nineveh province yimtiba, Mosul yimti meyipa arutsü onoki imlar. Iba yimti ya alima nung Khristan tejentibatam aliba yimti liasü," ta ashi.

Arrshi küm 75, Abdel Masih Selim-i, "Ni tanaben shia aru ama bilemer," ta ashi.

IS kiralongrartem merenba mapang nung pai Mosul yimti toktsür agenba sülen Iraq nung autonomous Kurdistan region kübok Arbil nung jenoka liasü.

Selim-a Tenla ki tanaben

lapokba sentong nungji adentsü atema Mosul-i aru. Pai, "Chaldea nungertemi parnok meyong Tenla ki reprangtsü atema aruogo. Kiralongrartemi amakba ajanga Khristantem jena aotsüsa aküm," ta ashi.

Iraq nung yimti tanabuba Mosul ya mosques, Tenla kitem aser temeshi tesem aika aliba tesem ka lir. Ajisüaka 2014 küm Islamic State group (IS) kiralongrartemi Iraq maakdoka Mosul nung "caliphate" yimli sangdongba mapang nung Nineveh province nungi Khristan meyrjang aika jenshia liasü.

Um al-Mauna jara temalen Islamic kiralongrartem jagi, "telungi aittsü memelar, ibai Islamic State Hesba Division [the religious police] tetuyuba lir," ta zülüja liasü.

Iba mapang nungji kiralongrartemi Khristantem dang Islam yimsü agizüksü tuyuba den külemi saru temeja agütsütsü tuyu, yamaji mesüra toktsür aotsüla mesüra tepsettsü, ta tuyua liasü.

2017 küm US-i pusema Iraq sepaitemi IS kiralongrartem maakdoka liasü. IS yimsüsüba mapang nung Khristan yimsü dak sendakba maitsü aika samatsü aser Khristan yimsü

indang kürakyanglua ajak raksaja liasü.

Kiralongrartem jagisa Tenla kitem nung parnoki melungba oren balala zülusaja liasü, ajisüaka tanübo Chaldean Arogo Tenla kiji yanglushiogo.

Mosul nung tanga Tenla kitema aika yanglushidar saka Khristantem aika tanaben meyipa maru.

2021 küm Pope Francis-i Mosul yimti semdanga Khristantem dang tanaben iba yimti meyipa arua alitsü ajungshia liasü.

Iraq nung Khristan nütsüing teimtibaji Chaldean nung lir. 2003 küm tashi nung Iraq nung Khristan million 1 dak tema liasü saka iba linük nung iba linük nung Khristan nütsüing 400,000 dang kümogo.

Chaldean Catholic Arogo nung tongti, Raphael Sako-ibo, timtem aika liaka Iraq nung Khristantem tarutsü tia junga dang lir, ta shiogo.

April 5 nü iba Tenla ki semzükba sentong nungji jembidang Sako-i, "Iba ya asen linük aser asen li. Yangi asenok (Khristantem) ishika dang anünga liaka asenok iba linük nung alitsü," ta ashi.

ANOGO ABEN TSÜNGREM DEN

Temeshi Kibuba Benjung

- 1 Korint 11: 17-34

Asenok mapang kintem tebilemba lemsatsepba agi alimaji akümer ta asenoki metetta lir. Arogo shia osangtsüsang kaket nung kintem rongnung loktiliba, yimten nung aser rongsen ketsüing nung tatsütepba aliba asenoki azünger aser metetter. Saka item ajakji bushidangra alimaji tai masü, kija tai agi item ajak adoker. Idakji Khristan yimsüji tatembang tongtipang akümer kechiaser iba yimsü nükjidongji kija kümzüksüba nükjidong lir. Aji oda, Kibuba benjungji kija nungdak taroktiba nung tenzüksü atema alir.

Kija taküm Tsüngrem nungi pila lira shidakba tangatetba nung kija taküm jagi nükjidong matong. Shibai amanger saka pa/ la Tsüngrem nungi pila alir ta shibai bilemer pa/la nem Kibuba benjungji agütsür. Shilem agirtem nem teti Kibuba Khrista O tem bilemtetdaksütsüla. Iba marok kü azü tasen tezüngzüktepba lir. Kibuba benjungji Khristantem tamang nungi adokba taochi tezüngzüktepba Tsüngrem ajanga agütsüba lir.

Anungji shilem agiba jagi Tsüngrem temeim aser tatok agütsüba bilemtetdaksür aser kija taküm agizükba tangatetbaji renlokdahtsür.

Itimi shisadangang: Ne lima raksaa lir asü? Na-a raksa lir ta nai bilemer asü? Na anebtsütsü asoshi Khrista raksa ta bilemtetang. "Pa azükba agi na anepa lir ta bilemtetang". Ne tanelaren alangzükba aser aneptsüba asoshi Tsüngrem tenüing sangang.

Ukraine nung Arogotemi Russian Orthodox indang 'Holy War' aitsür

April 06, 2024: Russian lenirtemi, World Russian Orthodox Arogoi Ukraine People's Council-i sangdongbaji anema "Holy War" ayongzükba rara ayongzükba lir, anungji atema Ukraine nung Arogotemi alima linüktemi ibaji aitsütsüla, longjemer aitsüogo. ta metetdaksü.

Ukraine nung Arogotemisa alima nung Khristan organisations ajak dang alima 'map' nungi Ukraine samatsütsü merangba ya aitsütsüla, ta mepishi.

Conference of European Churches den Ukraine nung Roman Catholic aser Orthodox lenirtemi sangdong ka ajanga, "Russia nung tangatetbaji onoki aija arur, kechiyong Russia-i ambangyima inyakbaji parnoki medenja jembir," ta metetdaksü.

"Tang tesüsabuba sangdongba document ajanga Ukraine nung ya lisopur telok ka ta magizüker aser linük temeden magizüker. Iba document ajanga rara medentsüba den külemi Russian Federation-i Ukraine litsü nung nisung jenti tepsetba medentsür aser maneni ozüing alema inyaksü ayongzükba," ta metetdaksü.

Ukraine nung yimsü

Parnokisa World Council of Churches, Conference of European Churches aser International tentettem danga iba document ji aitsütsü aser parnok pusemertem anema inyaksü ayongzük.

Ukrainian Orthodox Church (OCU) nungi Metropolitan, Epiphany (Dumenko)-i, "Russia-i Ukraine anema raraba ya temeshi masü. Russia-i Ukraine amakba pusemertem (Russian Orthodox Arogo) jagi Tsüngrem tenzükba masü saka satan tenzükba," ta metetdaksü.

"Russian Orthodox Arogo iba ama Holy War ayongzükbaji Khristan tangatetbatem den mapet. Russia nung Orthodox Arogoi shidakba agibo iba rara anema ola adoktsüla saka iba rara pusemer. Sepaitemi tashiyim amshia rarabaji evangelical tesayuba den mapet," ta paisa metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Süktang

(v) süng mesüra au ana küma kotangba (break wood type material into two)

* Süng tila asüba agi ana küma süktang.

Sülasüshi

(adj) merepshia, prokshia tipmetemi ayuba (keep things disorderly)

* Kidang tanurtemi süoshi sülasüshia mayutsü atema sayutsüla.

OLONG PAITEP # 6750

Grid for OLONG PAITEP # 6750 with numbers 1-15 placed in specific cells.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6749 TELANGZÜBA

TIPIEN :

- 1. Aben, 4. Artsü, 7. Lisem,
8. Liwa, 9. Sarasadem,
12. Aket, 14. Mangu,
15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
6. Belem, 9. Sükak,
10. Aonung, 11. Dokan,
13. Tinu.

NAI-A YA METETTER MA
MAPANG TEKARATIBA NUNG ONGKO INYAKBA



Delhi Public School Nashik nung Class 9 kaketshir Aaryan Shukla-i Guinness World Record ka ngutetogo. Iba ya 'fastest time to mentally add 50 five-digit numbers' atema lir aser pai second 25.19 nung iba otsü yangluteta liasü. February 29, 2024 nü Milan nung Italian TV show Lo Show Dei Record nung Aaryan Shukla-i iba otsü yangluteta liasü.

Guinness World Record dak alia arishi küm 13 tain Aaryan Shukla-i mental mathematics nunga takok aika nguogo. Pai Mathematics aser Science nung national & international Olympiads aika nung shilem agia arur.

Shukla ya Global Mental Calculators Association (GMCA) founding board members nunga züngsema lir. Pa arishi küm 8 asüdang Istanbul, Turkey nung Memorial Turkey Open Championship alidang India tenüng nung shilem agia medals 10 tashi nguteta liasü.

Tripura Congress President-i EVMs nung tenüng melenshitsu ashir



Agartala, April 7, 2024

(Agencies): Tripura Congress President Asish Kumar Saha-i Election Commission of India nung Chief Election Commissioner dang EVM machines ajak nung pa tenüng tai enoka aliba melenshitsu atema shidi ka züluogo.

Tripura kübok West Parliamentary Assembly nung Saha ya INDIA Bloc aser Congress candidate lir.

"Election atema VVPAT machines nung kü tenüng Bengali oshi nung aibelen enoka lir. Iba aibelen ya Model Code of Conduct alema dang masü saka vote enoktsürtem anisatsü lenmang lapoktsür. Iba mapa atema ni tebilemtsü abener kechiyong election maparen nung timtem ajurutsü" ta Saha-i CEC dangi shidi zülu.

CEC-i aibelenertem

jangjatsü asoshi iba tatalokba atema bushisüngdang asütsü ayongzüker, ta Saha-isa ashi.

"Maneni, constituency kübok tesem ajungalen EVM machines nung kü tenüng aibelen enoka aliba metongshitsu mepishir. Iba ajanga vote enoktsürtem manisatsü aser election maparen tashishitsu melii inyaktettsü" ta paisa ashi.

Arunachal election sülen PPA-i BJP den tesentaktep ayutsü

Itanagar, April 7, 2024

(Agencies): People's Party of Arunachal (PPA)-i election agiba sülen Bharatiya Janata Party (BJP) den tesentaktep yanglutsü osang metetdaksüogo.

Arunachal Pradesh nung North East Democratic Alliance (NEDA) kübok iba tesentaktep alitsü ta PPA secretary general Kaling Jerang-i Honibarnü ashi.

PPA-i NEDA convener aser Assam Chief Minister Himanta

Biswa Sarma den tawa tu ajurutepa jembiogo aser idangji election agiba sülen tesentaktep yanglutsü mulungtep ta Jerang-i ashi.

Assembly elections nung PPA-i BJP candidate tem den tokteptsü aser election agiba sülen BJP den tesentaktep alitsü ta paisa ashi.

"Onok tsüngda candidates lemsateptsü makoker anungji election magidang tesentaktep meyanglutettsü saka election

agiba sülenbo sendakteptsü" ta Jerang-isa ashi.

Lok Sabha elections nung PPA-i BJP candidates yaritsü lemtetogo. Arunachal Pradesh nung parliamentary menden anaprong nung PPA candidate mali ta paisa metetdaksü.

Arunachal East Parliamentary Constituency kübok PPA candidate 8 aser Arunachal West constituency kübok candidate 4-i BJP MP candidates yaritsü.

Karbi Anglong nung nisung 2 ket nung pistol ana apu

Guwahati, April 7, 2024

(Agencies): Lok Sabha elections agitsü mapang tonga arudang Karbi Anglong nung ozüng alema prangpong abener nisung ana puogo.

Deobarnü Khatkhati kübok

Balijan anasa nisung ana ya apu. Osang tejangja kar angazükba sülen police-i gari (AS26F5554) anendaktsür mita reprang.

Idangji gari nung 0.32 aser 0.22 calibre pistol kaka den

injang round 13 bena aliba angu. Tena dang asüngdangya asüdang licence maliasü.

Nisung ana ya Sibiston Islary aser Manajil Narzary ta jangjaogo aser tena Chirang, Assam nungi lir.

Silchar nung nisung 3 ket nung Yaba süngjang 100,000 apu



Silchar, April 7, 2024

(Agencies): Assam kübok Silchar nung Border Security Force (BSF)-i nisung asem ket nung Yaba süngjang 100,000 bena aliba atema apu.

Par asem ya Sepahijala district, Tripura nungi Md Bahar Miah aser Uttam Sarkar aser Torbung district, Manipur nungi

Naorem Singh nunger ta jangjaogo.

Par asemji Yaba süngjangji Imphal nungi bener aru aser West Bengal-i bener aotsüba liasü.

Osang tejangja ka angazükba sülen BSF telok kati Silchar nung Tata truck gari ka soter mita aodang

Yaba süngjangtem bena aliba angu.

Yaba süngjang 100,000 ya international market nung Rs 10 crore shi alang lir. Par asemprong Assam Police ket nung agütsüogo aser Narcotic Drugs and Psychotropic Substances Act, 1985 kübok ken o ka benokogo.



DEAREST ALA,

IT HAS BEEN 25 YEARS SINCE WE PARTED BUT NOT A DAY HAS GONE BY WITHOUT YOU IN OUR THOUGHTS. YOU ARE NOW A GRANDMOTHER TO TWELVE WONDERFUL GRANDCHILDREN. WE WISH YOU HAD MET THEM BUT WE MAKE PEACE IN OUR HEARTS THAT YOU WILL BE WITH THEM ALWAYS BECAUSE WE SEE YOUR LOVE IN THEIR EYES EVERYDAY.

WE MISS YOU. WE WOULDN'T BE WHERE WE ARE WITHOUT YOUR GUIDANCE AND LOVE.

FROM YOUR LOVING FAMILY.

IN LOVING MEMORY OF IMNASANGLA

Slovakia tir inyaksü Pellegrini shimogo



Bratislava, Rongchii/April 07 (Agencies): Slovakia nationalist-left sorkar indang candidate Peter Pellegrini-i linük indang tir election nung takok nguogo, anungji Russia bhukumba Ato Kilonser Robert Fico-i linük yimtenren nung soita aliba tali akangshir.

Slovakia nung tir atema election agiba nung vote shilem 99.66 agütsüba nungi Pellegrini-i vote shilem 53.26 angu aser pro-Western opposition candidate Ivan Korcok-i shilem 46.73 angu ta ashir.

Kümsük pezü buba atema taoba küm October ita ato kilonser mapa agizüksang Fico-i linük indang foreign policy ya Russia tsütsü tejak shia kumtar aser criminal law aser media tsütsü temelenshi tenzükbaba ajanga tzüzüing-ozüing tashi

ajema akumtsü ama ajiteter. Slovakia tir dak executive tashi aikabo mali saka ozüing tem veto sütettsü mesüra Constitutional Court nung ken o benoktettsü. Parnoki Constitutional Court judges tem shimer, aser parnoki Fico indang temelenshi balala asoshi tongtipang akumtsü aser ochimashi mapa inyaker nem temerenshi agütsüba ajemtsü. Fico indang coalition nungya Pellegrini-i aniba party ka dena lir aser Slovak ktdangsurtemi Ukraine nem nok-nü bener yokba parnoki soita ayu aser Western linüktemi rara atsüshiba ajanga Slavic linüktem kati ka tepseter, ta Fico-ia shia liasü. Arishi küm 48 tain Pellegrini-i ashiba agi, pai takok anguba tetetzü sorkar nükjidong tongtettsüa parnok

yaritsü aser liberal telok nungi tir menden yutsüsang Zuzana Caputova athishia "opposition, opportunistic power centre" majurutsü, ta ashi.

"Nüburtem takum melenshidaktsütsü merangba sorkar yariba tir ka akumtsü," ta Pellegrini-i par campaign headquarters nung shia liasü.

"Rara masü tesunep tsütsü Slovakia teti alitsü atema ni akokba mapa inyaksü."

Pellegrini ya Smer nung Fico indang taoba deputy ka liasü aser 2018 küm osangbener Jan Kuciak aser pa tetong tepsetba mechi sorkar anema longkak aitba sülen Fico mapa nungi anentsüsa akum aser Pellegrini ya ato kilonser akim.

2020 election nung mangatettep adoka Smer nung election makokba sülen Pellegrini aser Fico na khen pila liasü.

Pellegrini den toktepsang Korcok yagi Kyiv indang Western allies tem ama, Ukraine nem no-nü agütsüba anenba ajanga yimjung marutsü saka Russia-i takok angutsü ta shia liasü.

Arishi küm 60 tain independent candidate Korcok ya EU nung Slovakia indang envoy liasü aser iba sülen ambassador to United States akum aser 2021-22 nung centre-right sorkar indang foreign affairs portfolio agia liasü.

LAND FOR SALE

AT YIMYU WARD
NEAR INDIAN OIL

--- CONTACT ---
6909248832 / 9774347784

Gaza nung pua alirtem chioktsü khanga Israel nung longkak ait

Tel Aviv, Rongchii/April 07 (Agencies): Gaza nung pua alirtem chioktsü asoshi jembishiniüang ta Israel Ato Kilonser Benjamin Netanyahu nem takhangba agüja Israel nungertemi longkak aita liasü.

Hamas teloki October 7 nü pua bener aoba Elad Katzir tasü mang Israel Defense Force (IDF) ajanga ngutetba sülen Tel Aviv aser danga yimtitem nung longkak aita liasü.

Longkak aiter temi "tang elections agiang" aser "Elad, onok dang tejashi," ta ayimtena liasü.

Mapang tatsüka lir police temi tashiyim amshia Tel Aviv nung adenshia alirtem aridok.

Sorkar anema longkak aitertem den Gaza nung pua aliba kinungertem dena liasü. Gaza nung Hamas aser par den sendaktepa aliba telok temi pua aliba nisung 130 shi chioktsü atema sorkari mapa meinyaktetba asoshi longkak aiter temi tejashi lemsatetpa liasü.

Honibarnü IDF temi Elad Katzir indang tasü mang nguteta liasü, shiba Hamas teloki October 7 nü Israel south tsütsü amakdang Gaza-i pua bener ao. January ita video ka prokshiba nung pa takum liasü.

"Elad Katzir ita asem tepuokdak takum ali. Tanü pa onok den lila," ta longkak aiter Noam Peri-i osangbener dang ashi.

Tel Aviv nung longkak aiter nisung 100,000 liasü ta iba

sentong ayonger temi ashi aser dangartemi nisung 45,000 shi liasü ta ashi. Tanünga pua alirtem chioktsü asoshi Ato Kilonser Netanyahu-i kecha meinyaktetba yong sorkar anema longkak ait tenzüker tang tetesüsa alitsü.

Tel Aviv nung longkak aiter alidak gari ka arua atsüంగా nung nisung pungo yiru, aser police temi gari anisang puogo ta ashir.

Tang Gaza nung rara aliba tenzüksüsa Hamas teloki maker Deobarnü ita trok ajung aser iba anogo yimjung ken o jembirtem Cairo nung adenshia ceasefire alitsü asoshi jembitsü sentong lir.

Egypt, Israel aser Hamas nungi negotiator tem den CIA Director Bill Burns aser Qatar Ato Kilonser Mohammed bin Abdulrahman Al Thani adentsü, ta osang kar ajanga ashir.

October 7 nü Hamas-i amakdang civilian tem timba sür nisung 1,200 shi tepseta liasü.

Iba sülen Israel-i Gaza makyonga arudang nisung 33,000 dak tema tepsetogo aser parnok ya aika tetsür aser tanurtem lir ta Hamas meyong health ministry ajanga ashir.

Hamas-i amakba mapang Israel nung aser bendanger nisung 253 pua bener ao ta Israel-i ashir.

Pua bener aor nisung 129 shi kechi tia nung aliar memetet. Nisung 34 süogo ta züngshir aser IDF-i tasü mang 12 ngutetogo.

Russia kübok Orenburg tesem nung Federal emergency benokogo

Moscow, Rongchii/April 7 (Agencies): Europr nung ayong talangtiba rongnung tasembuba moshia yima tzünokdang ka pokdangba sülen Russia kübok Ural tenemtsüng nung aliba yimti ana tzü agi metsüngogo, aser iba ajanga ki 6000 shi metsüంగా den nisung meyrejang aika jenshia aotsüsa kümogo.

Russia kübok Ural tenemtsüng nung aliba tesemtem, Siberia aser kidanger Kazakhstan nung tesem kar ta, küm aika tsüంగా tang tzümetsüng tamajungtiba agi kongshir lir.

Ural ayong koba Ural tenem nungi apoker iba ayong ya Caspian tzüym nung yimoker, iba ayonga ya rürjeb yimsaba ajanga Hokolbarnü ghonda ishika tsüంగా metre

aika metsüంగా atua yima liasü aser iba ajanga Moscow nungi anütoklen km 1,800 pilar aliba Orsk yimti nung dam embankment ka ajanga moshia yima liasü.

Russia indang Emergencies Minister Alexander Kurenkov tekümsükba maparen achaayangtsü atema Deobarnü Orsk yimti tongaogo. Iba yimti ya tzümetsüng agi tamajungtiba kongshiba rongnung ka lir.

"Orenburg tesem nung tensa ya federal emergency ka ta ni shidangogo aser federal jenjang nung telangzüba agütsütsü atema inyakyimtem amenokogo," ta minister-i ashiba state news agency RIA Novosti sangdong ka ajanga metetdaksü.

(Maneni tapak 8 nung...)

Mkg nungi football jangrar parnok 10 Hawk Football Academy, Guhawati-i yokogo



Par 10 den tsurabur, adianutem aser Marepkong Youth Association ketdangsurtem densema angur.

Mokokchung, Rongchii/ April 7 (TYO): Marepkong Youth Association-i achayanga Mokokchung nungi football jangrar tebur chanu parnok 10 Deobarnü Guwahati-i yokogo. Iba maparen ya taküm 5buba Mokokchung Inter-ward Football Tournament 2024 asayaba mapangtu tayonger MYA-i tejangrar lira football academy-i aotsü asoshi lenmang sayutsü ta sangdongba ama, ward asem (3) nungi tejangrar parnok 10-i iba maongkaji mezüngbuba agir asütsü.

Taor rongnung Arkong ward nungi nisung ka - Tajungsang, Sangtemla ward nungi par asem -Meyasenba, Molutsupong aser Nungshichujang, aser Tongdentsuyong ward nungi

parnok 6 -Linukmatsüng, Lanutemsü, Toshimongba, Imnazülü, Nokinyanger aser Atuchang lir.

Par 10 ya Hawk Football Academy, Guwahati nung anogo 8 nü tetandangba (trail) ka agitsü aser iba tendangba nungji takok ngutetra, India tesem balala nungi club balalai anir aotsü, ta Marepkong Youth Association ketdangsür, Bendangnükshi shiba 5th Mokokchung Inter-ward football tournament nung Convenor liasü, pai metetdaksü.

Asayar aika rongnung parnok 10-i temulungtetba tulu yur aotsü mulungogo, nenok ajak dang pelar, saka nenok ya kazüi aorba masü, pi lima aor asünung timtem balala ajurutsübasa aser talisa

academy ka nungji libaliru aser achiajemba ya kanga sashia repranger, anungji, tazüokba nung aliba den pei sempet tajungtiba amshitsü asoshi pai taortem ajungshia liasü.

Mokokchung nungi iba ama ayongteper aoba yabo ibai mezüngbuba asütsü südi. Nenoki junga litetra Mokokchung asoshi tenüng tajung aser otsü tasen yanglur asütsü, aji oda, mejungi litetra otsü tamajung yanglur asütsü, ta paisa temulung tanga alitsü asoshi olen ka lemsatsep.

Deacon Toshi Lemtur-i taortem atema temoatsü meshia sarasademtsü. Parnok meinoktsüba sentong tongmelang ka Tongdentsuyong Community hall nung agi aser iba nung taortem tsurabur aser adianutem densema liasü.

1buba Phom Monyiu amateur badminton tournament takok ngua asayaogo



Dimapur, Rongchii/April 7 (TYO): Dimapur Sakshi Union-i ayongzükä 1buba Phom Monyiu amateur badminton tournament April 4 aser 5 nü Multi-disciplinary sports complex DC court junction Dimapur nung kanga takok ngua asayaogo. Iba asayamung ya " LETS CELEBRATE PHOM MONYIU WITH A SMASH" omen nung ajemdaker asaya liasü.

Taküm Dimapur Sakshi Union-i, Naga nunger aser talisa Phom nunger yongtsü nung badminton asaya aser iba den sobaliba, libaliru aser sobaliba chiyongtsü ajungkettsü nükjidadong nung Phom Monyiu benjung amungtsü telemtetba agia liasü.

Ajak senteper iba asayamung nung team 56-i shilem agi, kong Arunachal Pradesh aser Bokajan Assam nungia team kakati shilem agia liasü.

Asayamung ya teküboklen agüja aliba category balala küma lemsar asaya liasü:

Sl.No	EVENT	CATEGORY
1.	AMATEUR	MENS DOUBLES
2.	MASTERS	75 MENS DOUBLES
3.		85 MENS DOUBLES
4.	MASTERS	95 MENS DOUBLES

Asayamung lapokba nü Dimapur Phom Union tatong Tir alakteta jaoker liasü aser pai India aser talisa Nagaland nung badminton asaya ajanga kongshiba indang lemsatapa liasü.

Paisa, lanurtem dang saisapong nung tali tejangraba nung bendanga agüja shilem agitsü ajungshia liasü.

Senpet ajak senteper sen meyirejang 85 agüja liasü.

Category balala nung takok angurtem:

Mens Amateur
 Winner : Anahito Aye & Ikato Assumi
 Runner Up : Vitoka Awomi & Toka V. Swu

Masters 75+
 Winner : Vitoka Awomi & Hekato Swu
 Runner up : Kikameren Jamir & Watitemjen Jamir

Masters 85+
 Winner : Kavito Choppy & K Pikuto Chishi
 Runner Up : Meyiakum Jamir & Hekato Swu

Masters 95+
 Winner : Kavito Choppy & K Pikuto Chishi
 Runner Up : Bablu Gurung & P. Chakma.

Sumit Nagal Monte-Carlo Masters atema qualify süogo Rongchii/April 7, 2024
(Agencies): Deobarnü Monte Carlo Masters atema qualifiers tatembangbuba round nung World No.55 Facundo Diaz Acosta akokba sülen India nunger asayar Sumit Nagal iba asayamung main draw atema qualify sütetogo.

Nagal-i iba asaya 7-5, 2-6, 6-2 agi koka liasü.

Mezüngbuba qualifier asaya nung nagal-i Italy nunger asayar Flavio Cobolli straight set nung 6-2, 6-3 agi koka liasü.

Main draw atema qualify asüba sülen Nagal ya India nunger asayartem rongnungi küm 42buba nung tang mezüngbuba iba nüngtugu clay-court asayamung atema qualify asüba asayar kümogo. Iba asayamung atema 1982 küm Ramesh Krishnan-i qualify süteter liasü.

Asaya mezüngbuba set nung Nagal 2-5 agi tesülen liasü, ajisüaka pai asaya pongu atonga koka pa tejangdang aküm. Tanabuba set nung tamakok nguaka Nagal-i decider nung asendenshir kanga junga

asayateta iba asaya kokogo. Sumit Nagal-i taküm kanga junga asaya arudar, kong January ita Australia Open nung Alexander Bublik akokba densema lir. Iba sülen pai Chennai Open akok aser ATP rankings nung top-100-i ia liasü. Iba hopta tetenzüklen pa jenjang 95bubai tuogo, koba pa indang career nung jenjang tajungtiba asütsü.

Kasa mapang nung Bodhbarnü Nagal-i kanga meranga asaya ajisüaka Marrakech Open tebur kija asaya pre-quarterfinals nung tsüka liasü. Iba asaya nung pa Italy nunger asayar Lorenzo Sonego-i 6-1, 3-6, 4-6 agi tsükdakja liasü.

Sumit Nagal dak alia world number one tarep asayar Rohan Bopanna aser pa indang Australian partner Matthew Ebden nati Monte Carlo Masters nung top seed ama asayaba angutsü.

Tenati taküm kanga junga asaya arudar aser January ita Australian Open tebur tarep asaya dena kokogo.

BENDANGLI OSANG : Tapak 7 nungi...

Russia kübok Orenburg tesem nung...

Orsk kong nütsünyongsük 230,000 lir aser iba yimti metsüngba sülen nisung 4,000 dak tema aninogo. Ministry of Civil Defence, Emergencies and Disaster Relief-i sayuba noksa aser video tem ajanga nüburtem tekong tashi tzu agi metsünger tekümzükba bushia aoba, azütem kümzükba aser tzüng agi metsünger aliba lenmangtem nung rong balala nung mener nüburtem senzütepa nguogo.

Orenburg tesem governor, Denis Pasler-i ashiba agi, tzümettsüng aruba mangaoka ayu tzenzükba sülen tang tzümettsüng agi iba tesem tamajungtiba kongshio.

Russia kübok tanga tesemtem nunga tzümettsüng arutsü akok ta tekümdangtsü metetdaksüogo aser Kurenkov-i ashiba agi, tensa tamajungba küma aotsü akok.

"Tzü maneni aika yimdar aser taruba anogo ishika tsüngda tzü tali ayimtsü akok," ta Orenburg yimti mayor Orenburg-i ashi. "Tzümettsüng tensa ano kanga mejungi lir," ta paisa shisem.

Russia indang media sangdong balala ajanga ashiba agi, ketdangsürtemi tzümettsüng ajanga roubles billion 21 alang teraksatsüba bener arutsüogo ta ashiba den tzu ya April 20

sülenang asemshia aotsü, ta metetdaksüogo. Kurenkov-isa, bottle nung zur aliba tzu aser mobile treatment plants tem nüngdaka lir ta ashi aser kasa mapang nung local health ketdangsürtemi ashiba agi, tzu agi metsünger aliba tesemtem nung hepatitis A indang vaccine agütsü tzenzükogo.

Local ketdangsürtemi ashiba agi, Orsk nung tzüinokdang ya tzu level 5.5 metres (18 feet) atema yanglu ajisüaka Ural ayong nung tzu level 9.6 metres (31.5 feet) küma liasü.

Federal investigators temi 2010 küm yangluba tzüinokdang yangluba mapang safety rules sülen manidakba aser maparen sentoka toktsüba atema criminal ken o ka lapokogo, koba prosecutor temi ashiba agi, tzüinokdang ya kanga junga anepalu masü.

Tzümettsüng aruba ajanga Orsk Oil Refinery nung Deobarnü maparen ajak anena ata. Taoba küm iba refinery nung totzü tone million 2.5 process sua liasü.

Kazakhstan nung Tir Kassym-Jomart Tokayev-i ashiba agi, Honibarnü aruba tzümettsüng ya linük nung küm 80 tsüngda tzümettsüng tesashitiba aruba liasü.

BILEMDANGANG "Temelenshi nü dak nungi tzenzükdakjang."